

BUSINESS Info Newsletter

NOVEMABR 2021 // BROJ 104

U ovom broju, između ostalog, čitajte:

- **Nesagledive posljedice povećanja cijene električne energije za stanovništvo i privredu**
- **Rukovodstva UPFBiH i sedam sindikata: Opterećenje rada i povećanje cijena električne energije u FBiH zatvaraju firme i gase radna mjesta**
- **Održana sjednica UO UPFBiH**
- **UPFBiH uputilo Ministarstvu finansija FBiH primjedbe u formi amandmana na Nacrt zakona o izmjenama i dopunama Zakona o Poreznoj upravi FBiH**
- **Ministar prometa i komunikacija FBiH prihvatio inicijative UPFBiH**
- **UPFBiH dostavilo primjedbe na Uredbu o provođenju postupka procjene učinaka propisa na razvoj male privrede**
- **Na inicijativu UPKS pokrenuta masovna akcija pošumljavanja na području KS**





Nesagledive posljedice povećanja cijene električne energije za stanovništvo i privredu

UPFBiH zahtijeva od odgovornih u Vladi FBiH i Elektroprivredi BiH da povećanje cijena električne energije ne smije biti više od jednocifrenog iznosa

Udruženje poslodavaca Federacije Bosne i Hercegovine upozorava da bi najavljeni povećanje cijena električne energije za privredna društva u FBiH rezultiralo nesagledivim posljedicama kako za privredu, tako i za stanovništvo i društvo u cjelini.

"Privredni sektor je u raljama vlasti i sa svih strana dobija samo udare. Osim povećanja cijena električne energije, privreda se suočava i sa troškovima koje će imati zbog najavljenog mijenjanja fiskalnih kasa te povećanja minimalne plate radnicima. Najavljeni poskupljenje električne energije bilo bi dodatno opterećenje od 200 miliona KM godišnje za privredu, a zamjena fiskalnih kasa privrednike će koštati od 75 do 80 miliona KM. Mi smo do sada potpisali pet kolektivnih ugovora s granskim sindikatima, što je bio dodatni udar na privredu od 25 posto. Samo se na doprinose time dodatno izdvaja oko 150 miliona KM godišnje. Ovo sve je poruka investitorima da nije pametno da investiraju ovdje, privrednicima da smanje svoje biznise i presele ih u neke druge zemlje, a građanima da pakuju kofere i idu vani", kazao je Smailbegović.



Prema riječima generalnog direktora ArcelorMittala Nikhil Mehte, ova kompanija godišnje potroši 500.000 megavata električne energije i sada su dobili ponudu za povećanje cijene od 125 posto.



"Ako dođe do ovog povećanja, to će za nas biti veliki udar, jer ovo nije jedino povećanje koje imamo. Osim struje, povećana je i cijena uglja koji se koristi u proizvodnji čelika 500 posto na koju ne možemo uticati. Ukoliko dođe do najavljenog drastičnog povećanja cijena električne energije nama će se više isplatiti da naših 2.300 radnika pošaljemo na čekanje i isplaćujemo im 55 posto plaće, nego da plaćamo ovu cijenu električne energije", kazao je Mehta.

Povećanje cijena električne energije predstavljat će snažan udarac i za autoindustriju u FBiH.

"Naša kompanija zapošljava 800 radnika i sigurno ćemo je morati zatvoriti i otići u stečaj. Doći će i do gašenja radnih mesta, nećemo iskoristiti šansu da razvijemo industrijski ovo područje gdje imamo bolju šansu i od Srbije", kazao je Adem Hanić, direktor TMD Group Gradačac.

Kasim Kotorić, savjetnik generalnog direktora kompanije "Pobjeda" Tešanj, istaknuo je da najavljeni drastično povećanje cijena električne energije dovodi mnoge kompanije u bezizlaznu situaciju.



"Ne možemo samo zatvoriti kompanije, potpisali smo ugovore čije neispunjavanje vodi u plaćanje penala i nove dubioze. O svemu tome oni koji odlučuju ne vode računa", kazao je Kotorić.



Sisecam Soda Lukavac je kompanija koja 80 posto sirovina nabavlja u Federaciji BiH.

"Povećanje cijena električne energije znači da bi došlo do povećanja cijena sirovina od strane naših dobavljača, čime bi bilo ugroženo i naše poslovanje jer je poznato da smo izvozno orijentirana kompanija koja izvozi 99 posto proizvodnje radnika", kazao je Sead Pašić, izvršni direktor lanca snabdijevanja i logistike Sisecam Soda Lukavac.



Iako nije najavljeni povećanje električne energije za domaćinstva, ovo drastično povećanje cijena za privredu bio bi direktni udar i na građane, jer bi doveo do drastičnog povećanja cijena dobara i usluga na tržištu. Oko polovine ukupne potrošnje električne energije u FBiH odnosi se na privredu, a druga polovina na domaćinstva. Godinama se ne povećava cijena električne energije za domaćinstva, a povećava cijena za privredu.

U konačnici, svako povećanje cijena električne energije za privredu plate građani, jer povećanjem cijena električne energije, dolazi do povećanja cijena dobara i usluga. Ovakav potez vlasti predstavlja lažnu brigu za socijalni status građana.



Svugdje u svijetu, osim u državama bivše SFRJ, cijena električne energije, ali i drugih energetika koju plaćaju domaćinstva je mnogo veća od cijena koje plaća industrija. Na taj način države brinu za socijalni status građana, jer povećanje cijene struje za privredu ujedno znači i drastično povećanje cijena dobara i usluga, što se automatski odražava i na građanstvo.

Svako od rješenja koja su nam do sada ponuđena neće spriječiti katastrofalne posljedice za privredu i stanovništvo FBiH.

Na primjeru jedne kompanije koja posluje u metalском sektoru, najbolje se vidi kakve bi negativne posljedice povećanje cijene električne energije imalo na njihovo poslovanje.

U 2021. godini kompanija će za troškove električne energije platiti oko 1.200.000,00 KM. Najavljeni povećanje cijene električne energije donijet će dodatni trošak od oko 1.450.000,00 KM, što bi u konačnici iznosilo 12 posto ukupnih troškova kompanije. Sa najavljenim poskupljenjem cijene električne energije, odmah bi morali otpustiti oko 30 posto zaposlenih, a cijenu glavnog proizvoda morali bi povećati za 30 posto u odnosu na postojeću, što niti jedan

kupac neće prihvati. Zbog svega navedenog reducirali bi proizvodnju za oko 40 posto, što bi opet za sobom povuklo sankcije i plaćanje penala zbog neispunjene obaveza prema potpisanim ugovorima. Te sankcije i plaćanje penala bi gurnulo firmu u poslovanje sa gubitkom, što bi izvjesno dovelo do njenog gašenja, čime bi se ugasilo stotine radnih mesta.

Sa drastičnim povećanjem cijena električne energije stanovništvo i privreda bi osjetili nesagledive posljedice. Došlo bi do zatvaranja pogona u kompanijama ili čak i kompletnih kompanija, kao i smanjenja obima proizvodnje, što opet za posljedicu ima otpuštanje radnika.

Gašenjem radnih mesta bili bi smanjeni prihodi budžeta na svim nivoima, kao i vanbudžetskih fondova. Došlo bi do značajnog rasta inflacije, jer bi se znatno povećale cijene dobara i usluga.

Sa najavljenim drastičnim povećanjem

cijena električne energije došlo bi do značajnog smanjenja izvoza i investicija, što za direktnu posljedicu ima smanjenje plaća, kupovne moći i niži životni standard građana.



Rezultat takve pogubne odluke za bosanskohercegovačku privredu bilo bi usporavanje i stagnacija te smanjenje konkurentnosti bh. privrede.

Zbog svega navedenog, iz Udruženja poslodavaca Federacije Bosne i Hercegovine zahtijevamo od odgovornih u Vladi Federacije BiH i Elektroprivredi Bosne i Hercegovine da povećanje cijena električne energije ne smije biti više od jednocijrenog iznosa, jer bi veće povećanje cijena ozbiljno ugrozilo privredne aktivnosti i životni standard stanovništva Federacije Bosne i Hercegovine.

Rukovodstva Udruženja poslodavaca FBiH i sedam sindikata zahtijevaju od Vlade da ne dozvoli enormno povećanje cijena struje i smanji cijenu rada

Enormno povećanja cijena električne energije za privredu će dovesti do smanjenja privrednih aktivnosti, gubitka radnih mesta i ugrožavanja životnog standarda



Rukovodstva Udruženja poslodavaca Federacije Bosne i Hercegovine i sedam granskih sindikata iz realnog sektora izrazili su zabrinutost najavom enormnog povećanja cijena električne energije za privredu, koje će dovesti do smanjenja privrednih aktivnosti, gubitka radnih mesta i ugrožavanja životnog standarda radnika i građana.

Sa zajedničkog sastanka upućen je zahtjev Vladi FBiH da u skladu sa zakonskim ovlaštenjima reagira i ne dozvoli enormno povećanje električne energije i time spriječi otpuštanja radnika i kolaps privrede.

Na sastanku je donesen zajednički zaključak da je neophodno bitno smanjiti opterećenja cijene rada, donošenjem novog zakona o doprinosima FBiH, kojim bi stopa doprinosa na plaće iznosila maksimalno 30 posto, čime bi se stvorili uslovi za dodatno povećanje minimalne plaće koju su dogovorili poslodavci i sindikati kroz kolektivne ugovore.

Opterećenje rada i povećanje cijena električne energije u FBiH zatvaraju firme i gase radna mjesta

Povećanje svih plaća, a ne samo minimalnih, u Federaciji BiH je interes poslodavaca i radnika. Jedina rezerva za značajno povećanje plaća upravo su porezi i doprinosi na plaće



Udruženje poslodavaca FBiH, Samostalni sindikat šumarstva, prerade drveta i papira i Sindikat hemije i nemetala FBiH upozorili su da će populističko nadmetanje pozicije i opozicije ko će predložiti veći iznos minimalne plaće, uz najveće opterećenje cijene rada u svijetu za rezultat imati zatvaranje firmi i gašenje radnih mјesta, prvenstveno obrta, mikro i malih poduzeća.

U okviru press-konferencije koja predstavlja nastavak zajedničkih aktivnosti UPFBiH i sedam sindikata iz realnog sektora definiranih Zajedničkom platformom potpisanim sredinom ove godine, naglašeno je da je hitno potrebno smanjiti opterećenja na rad.

Istaknuto je da Federacija BiH ima najveće opterećenje rada na svijetu, što je ilustrirano činjenicom da od npr. 1.500 KM koje radnik zaradi, u ovome trenutku vlasti uzimaju 670 KM, a radniku ostaje 830. Prijedlog UPFBiH je da se doprinosi smanje na 30 posto, čime bi država uzimala do 450 KM, a radnik bi dobijao 1.050 KM, što bi predstavljalo povećanje plaće za više

od 200 KM u odnosu na postojeće stanje.

"Na planeti zemlji nema entiteta na kojemu radnici manje sredstava donesu kući u odnosu na ono što zarade nego što je u Federaciji BiH. Povećanje svih plaća, a ne samo minimalnih, u Federaciji BiH je interes poslodavaca i radnika. Jedina rezerva za značajno povećanje plaća upravo su porezi i doprinosi na plaće. Poslodavci su saglasni kompletan iznos koji ostane nakon smanjenja poreza i doprinosa dati za povećanje plaća, jer nam je stalo da imamo zadovoljne radnike", rekao je predsjednik UPFBiH Adnan Smailbegović.



Naglašeno je da je u Republici Srpskoj već niže opterećenje na cijenu rada, a od 1. januara naredne godine ono će iznositi 31 posto, dok je u FBiH opterećenje 42,5 posto.



Direktor UPFBiH Mladen Pandurević je naglasio da više od 85 posto privrednih subjekata u BiH čine obrti ili mikro i mala preduzeća sa jednim do deset zaposlenih.

"Veliki broj njih će ukoliko ne dođe do značajnijeg smanjenja cijene rada, a dođe do znatnog povećanja minimalne plaće, biti prisiljeno otpuštati radnike ili zatvarati firme. Velike kompanije kojih u BiH ima oko dva posto će biti pogodjene u puno manjoj mjeri", naglasio je Pandurević.

Predsjednica Samostalnog sindikata šumarstva, prerade drveta i papira BiH Lejla Ćatić istaknula je da već godinama konstantno rastu troškovi života, a da je ovaj Sindikat uspio ispregovorati povećanje plaća u ovom sektoru za 25 posto.

"To je zajedničko rješenje do kojeg smo došli sa predstvincima poslodavaca. Ukoliko želimo sačuvati radna mjesta, smanjiti odliv radne snage iz BiH moramo povećavati sve plaće. A resurs za to su porezi i doprinosi čijim bi se smanjenjem omogućilo povećanje plaća zaposlenih", kazala je Ćatić.



Također je naglašeno da ne postoji niti jedan opravdan razlog za povećanje cijena električne energije za privredu u FBiH za 150 do 200 posto, naročito ako se zna da nijedna zemlja u svijetu nije povećala cijene električne energije za više od 33 posto.

"Vlada FBiH i elektroprivrede se još definitivno ne oglašavaju u vezi sa našim zahtjevima i očigledno kupuju vrijeme. U međuvremenu naše članice dobijaju ugovore za nabavku električne energije po cijenama čak za 220 posto većim u odnosu na one koje plaćaju sada. Posljedice tako drastičnih povećanja cijena električne energije za privredu najviše će osjetiti građani", kazao je Smailbegović.

Pandurević je upozorio medije da ne nasjedaju na spinove koji se pokušavaju plasirati u javnosti da će povećanje cijena električne energije osjetiti samo poslodavci i to oni najbogatiji.

"To nije tačno. Naprotiv, povećanje cijena električne energije privredi u FBiH dovest će do povećanja cijena hrane, roba i usluga koje plaćaju građani, koji će u stvari jedini biti pogodjeni. Više od dvije trećine računa građana za električnu energiju iznose od 20 do 30 KM. Kada bi se povećala cijena električne energije za građanstvo za 10 posto, na godišnjem nivou građani bi plaćali 20 do 30 KM više račune. Sa povećanjem cijena električne energije za privredu koje će dovesti po povećanja cijena hrane, roba i usluga koje plaćaju građani, godišnje će morati izdvajati 250 do 300 KM više. Eto kako vlasti brinu o građanima i njihovom životnom standardu", pojasnio je Pandurević.



Sektor hemije i nemetala također će biti pogoden najavljenim značajnim povećanjem cijena električne energije.

"Imamo kompanije koje sada plaćaju mjesecne račune za električnu energiju 500.000 KM, što je na godišnjem nivou šest miliona KM. Sa povećanjem cijena električne energije od 100 posto, računi će na godišnjem nivou iznositi 12 miliona KM. A zamislite da se samo dio tih sredstava preusmjeri na plaće radnika, a ne na, ničim opravdano, enormno povećanje cijena električne energije. Bojimo se da ukoliko Vlada FBiH i odgovorni ne promijene svoj stav da će poslodavci imati dvije mogućnosti – smanjiti plaće ili otpuštati radnike", rekla je predsjednica Sindikata radnika hemije i nemetala FBiH Ilvana Smajlović te pozvala Vladu da ne donese odluku kojom će cijena električne energije drastično porasti.

Održana sjednica Upravnog odbora UPFBiH

Potrebno jasnije definisati određene članovi Uredbe o metodologiji izračuna i usklađivanja najniže plaće




Proširena, 8. sjednica Upravnog odbora Udruženja poslodavaca Federacije Bosne i Hercegovine održana je 30. novembra 2021. godine na kojoj se razmatralo pitanje minimalne plaće.

Članovi su najprije razmatrali Prijedlog uredbe o metodologiji izračuna i usklađivanja najniže plaće koju je pripremilo Ministarstvo finansija Federacije BiH, a koja podrazumijeva iznos najniže plaće u brutu i netu te način usklađivanja ove plaće.

Članovi su podržali donošenje Uredbe, ali istakli da je potrebno jasnije definisati određene članove Uredbe. Istaknuto je da je potrebno precizno definisati izuzetke od primjene odredbi o minimalnoj plaći, te da će Udruženje pripremiti primjedbe na Uredbu i da će se o istima raspravljati na sjednici Ekonomsko-socijalnog vijeća FBiH.

UPFBiH uputilo Ministarstvu finansija FBiH primjedbe u formi amandmana na Nacrt zakona o izmjenama i dopunama Zakona o Poreznoj upravi FBiH

Amandman UPFBiH odnosi se na propisivanje instituta absolutne zastare, koji trenutno nije propisan u Zakonu o poreznoj upravi FBiH



Udruženje poslodavaca Federacije Bosne i Hercegovine uputilo je Ministarstvu finansija Federacije BiH primjedbe u formi amandmana na Nacrt zakona o izmjenama i dopunama Zakona o Poreznoj upravi FBiH.

Amandman Udruženja poslodavaca FBiH odnosi se na propisivanje instituta absolutne zastare, koji trenutno nije propisan u Zakonu o poreznoj upravi FBiH. To ujedno znači da porez ne zastarijeva i da porezna tijela mogu postupati uvijek i po vlastitoj volji.

Svrha instituta zastare je da doprinese ostvarenju pravne sigurnosti i sprečavanju stanja trajne pravne zaštite. Pravni poredak i pravna sigurnost ne trpe postojanje trajnog stanja u kojem se prava ne ostvaruju i obaveze ne izvršavaju i zbog toga se i vrijeme pravne zaštite mora ograničiti zakonom.

Predlaganjem uvođenja instituta absolutne zastare ne želi se omogućiti neplaćanje poreznih obaveza, štaviše želi se doprinijeti efikasnosti rada poreznih organa i učinkovitijoj naplati poreza.

Ukoliko se ne uvede institut absolutne zastare za par godina porezni organi biće zagušeni ogromnim brojem starih predmeta, tako da će se dovesti u pitanje njihova efikasnost u rješavanju budućih poreznih prijava.



Propisivanjem absolutnog roka zastare u Zakonu o poreznoj upravi FBiH izvršit će se harmonizacija propisa sa propisom u RS-u koji propisuje da pravo Porezne uprave na naplatu poreznih obaveza u svakom slučaju zastarijeva istekom roka od šest godina od dana dospjelosti za plaćanje prijavljene porezne obaveze ili izvršnosti rješenja za plaćanje.

Postojanje ovog roka u RS-, a nepostojanje u FBiH dovodi u neravnopravan položaj porezne obaveznike na području dva entiteta. Na ovaj način se diskriminiraju lica na području jednog entiteta, a Ustav BiH, u članu II.4. propisuje zabranu diskriminacije po bilo kojem osnovu.


Isti rok je propisan i u zemljama okruženja. Apsolutni rok zastare u Srbiji, Crnoj gori i Sloveniji je deset godina, dok je prema Općem poreznom zakonu Hrvatske pravo poreznog tijela na naplatu poreza zastarijeva za šest godina.

Apsolutni rok zastare predviđen je za indirektne poreze, pa čak i u prijedlogu novih zakona o doprinosima i porezu na dohodak koji su trenutno u parlamentarnoj proceduri. Kako se ne bi desilo da stupanjem na snagu pomenuta dva zakona dođe do nejasnoća u primjeni zakonskih odredbi, neophodno je izmijeniti Zakon o poreznoj upravi FBiH.

Ministar prometa i komunikacija FBiH prihvatio inicijative UPFBiH

Direktor UPFBiH Mladen Pandurević i predstavnici Grupacije poslodavaca za djelatnost cestovnog prometa FBiH Nedžad Siočić i Safudin Čengić održali su 16. novembra 2021. godine sastanak sa ministrom prometa i komunikacija FBiH Denisom Lasićem i saradnicima.

Na sastanku se razgovaralo o inicijativi UPFBiH da prevoznici budu uključeni u programe dobivanja poticaja jer su neopravdano izostavljeni, a imaju veliki pad prihoda u odnosu na period od prije pandemije. Ministar Lasić je podržao inicijativu Udruženja poslodavaca FBiH.



Na sastanku je također raspravljano i inicijativi UPFBiH za izmjenu dva člana u Zakonu o cestovnom prijevozu FBiH. Prva izmjena je u smislu da se briše obaveza da osoba koja vrši prijevoz motornim vozilom mora da ima najmanje III stepen stručne spreme za zanimanje vozač motornog vozila, jer se nametanjem ove obaveze

doprinosi nedostatku voznog osoblja. Nadalje, traži se usklađivanja državnih i entitetskih zakonskih i podzakonskih akata u dijelu koji propisuje obavezu obavljanja preventivnog tehničkog pregleda teretnih vozila. Naime, postoji kolizija između državnih i entitetskih propisa u pogledu preventivnog tehničkog pregleda za teretna vozila čija najveća dopuštena masa ne prelazi 7.500 kg, na način da državni propisi ne predviđaju vršenje preventivnog tehničkog pregleda za takva vozila, dok propisi Federacije BiH to propisuju. Posljedice neusklađivanja propisa su narušavanje principa ravnopravnosti poslovnih subjekata u jedinstvenom tržišnom sistemu jedne države, ostavlja se mogućnost različitog tumačenja od strane inspekcijskih organa, stvara se pravna nesigurnost, direktno su finansijski pogođeni svi poslovni subjekti u FBiH koji imaju teretna vozila čija najveća dopuštena masa ne prelazi 7.500 kg, a privrednici u Federaciji stavljeni su u nepovoljan položaj u odnosu na privrednike u RS-u. Ministar Lasić je prihvatio i ovu inicijativu Udruženja poslodavaca FBiH.

Tematska sjednica ESV-a FBiH o uredbi o najnižoj plaći

Na tematskoj sjednici Ekonomsko-socijalnog vijeća za područje Federacije Bosne i Hercegovine održanoj 11. novembra 2021. godine u Mostaru načelno je dogovoren da Vlada FBiH utvrdi uredbu o visini najniže plaće u Federaciji BiH u narednih petnaest dana, kako bi na sjednici 2. decembra socijalni partneri dali svoje prijedloge.

Predsjednik Udruženja poslodavaca Federacije Bosne i Hercegovine Adnan Smailbegović kazao je nakon sjednice kako su oni već potpisali pet granskih ugovora gdje su povećali minimalne plaće za 25 posto.



godine.

"Danas smo načelno dogovorili da će Vlada Federacije BiH pripremiti uredbu gdje bi se definirala plaća po postojećem zakonskom rješenju ali i po budućem rješenju koje je dosta izvjesno, te uredbu ponovno uputiti Ekonomsko-socijalnom vijeću FBiH koje bi dalo svoje prijedloge i sugestije", objasnio je Smailbegović, napominjući kako je ipak na Vladi FBiH konačna odluka te da bi uredba, po njegovom mišljenju, trebala zaživjeti sljedeće

Po njegovim riječima, poslodavci zagovaraju opciju da se minimalne plaće definiraju prema branšama.

Predstavnik sindikata u ESV-u Mevludin Bektić ponovio je kako je njihov prijedlog da najniža plaća u FBiH bude 70 posto od sadašnje prosječne plaće u FBiH.

"Trenutno ne želimo da najniža plaća bude 406 maraka u Federaciji. Mi



ostajemo pri tome da najniža plaća bude 70 posto od prosječne plaće, a to je 700 marka neto bez ostalih naknada na plaću", objasnio je Bektić.

Kada je u pitanju zamjena fiskalnih kasa, Smailbegović smatra kako je to nepotrebno trošenje novca.



"Predloženo je da se organizira okrugli stol i pozovu sve zainteresirane strane i stručnjaci kako bi našli najbolje rješenje u cilju smanjenja sive ekonomije i povećanja fiskalne discipline. Smatramo da je softversko rješenje jedino ispravno, a vi birate uređaj koji vam odgovara. Ministarstvo financija predložilo je drugi model, a to je da se nabave novi fiskalni uređaji koji su savremeniji i bolji ali će to

privredu koštati oko 75 miliona maraka, što smatramo nepotrebnim trošenjem novca", kaže Smailbegović.

Pored toga, okrugli stol trebao bi biti organiziran i za pitanje oporezivanja na dohodak od prodaje udjela prema trenutno važećem Zakonu o porezu na dohodak.

Na dnevnom redu sjednice Ekonomsko-socijalnog vijeća FBiH bila je i cijena električne energije za privredne subjekte o čemu je Vlada na tematskoj sjednici zadužila radnu grupu koja će u narednih sedam dana pripremiti prijedlog.

Predstavnici UPFBiH na sastanku sa generalnim direktorom Arcelor Mittala



Predsjednik i direktor Udruženja poslodavaca FBiH Adnan Smailbegović i Mladen Pandurević, održali su sastanak 24. novembra 2021. godine u Zenici sa generalnim direktorom kompanije ArcelorMittal Zenica Nikhilom Mehtom o rastu cijena električne energije koje su već pogodile najveće potrošače u FBiH. Sastanku je prisustvovao i potpredsjednik Grupacije poslodavaca ZDK pri UPFBiH Ibrahim Meškić.

- Razgovaralo se, između ostalog, o zakonima o dohotku i doprinosima, koji se uskoro ponovo trebaju naći u Zastupničkom domu FBiH. Razmatrali smo sve opcije koje su najpovoljnije za poslodavce. Upoznali smo generalnog direktora AMZ-a s tim šta bi za njih to značilo, kaže Meškić.

Dodaje da ono što najviše pogađa ArcelorMittal Zenica jeste najavljeni povećanje cijena struje i predloženi ugovori koje je Elektroprivreda BiH dostavila velikim potrošačima.

- Kako je AMZ najveći potrošač električne energije u Federaciji BiH, zabrinuti su zato što EPBiH misli primjeniti standarde sa Budimpeštanske berze. Oni moraju potpisati novi ugovor sa EPBiH do kraja godine. Ponuđen im je ranije ugovor po kojem bi cijena bila veća za 125 posto u odnosu na ovu godinu. Postoji opasnost da cijena bude i veća. Sada je na Budimpeštanskoj berzi cijena 200 posto veća u odnosu na isti period 2020., a EPBiH koriguje cijene prema njima. To bi značilo ključ u bravu za gotovo sve kompanije koji su veći potrošači, istakao je Meškić.

UPFBiH dostavilo primjedbe na Uredbu o provođenju postupka procjene učinaka propisa na razvoj male privrede



Udruženje poslodavaca FBiH je dostavila Ministarstvu razvoja, poduzetništva i obrta FBiH primjedbe u formi amandmana na Uredbu o provođenju postupka procjene učinaka propisa na razvoj male privrede.

Udruženje pozdravlja donošenje ove uredbe koja je od izuzetnog značaja za poslovnu zajednicu u FBiH. Međutim, da bi Uredba imala potpuni efekat i usklađena sa zakonodavstvom zemalja Europske unije, potrebno je u istu ugraditi primjedbe UPFBiH.

U amandmanima UPFBiH traži se da se Uredba treba odnosi i na procjenu prednacrta i nacrta zakona, jer je veoma mali efekat procjena samo provedbenih propisa, obzirom da se u većini slučajeva zakonima uvode nova opterećenja za MSP. Jedan od najboljih alata kojim se može utjecati na kvalitetu zakonodavstva je procjena učinaka propisa. Procjena učinaka propisa služi nosiocima izrade propisa u prevenciji nedorečenih, nekvalitetnih, administrativnim preprekama opterećenih zakonskih propisa. Također, traži se da se Uredbom definiše da su obavezne konsultacije sa socijalnim partnerima odnosno reprezentativnim udruženjem poslodavaca i reprezentativnim sindikatom, jer se socijalni partneri u svim državama EU ne izjednačavaju sa zainteresiranom javnošću.

Amandmane Udruženja možete pročitati [OVDJE](#).

Predsjednik i direktor UPFBiH u posjeti Srednjobosanskom kantonu

Predsjednik i direktor UPFBiH Adnan Smailbegović i Mladen Pandurević posjetili su u srijedu, 03. novembra 2021. godine, Srednjobosanski kanton i članice iz Bugojna i Busovače.

Sastancima je prisustvovao i predsjednik Grupacije poslodavaca SBK pri UPFBiH Kemal Čolak.

Na sastancima je razgovarano o problemima sa kojima se privreda suočava, te o prednostima koje poslodavci imaju kao članice UPFBiH u rješavanju tih problema.

Održana sjednica UO Agencije za unapređenje stranih investicija u BiH

Sjednica Upravnog odbora Agencije za unapređenje stranih investicija u BiH održana je 17.11.2021. godine, na kojoj se raspravljalo o promotivnim aktivnostima FIPA-e za period januar-septembar 2021. godine i o Programu rada FIPA-e za 2022. godinu. Sastanku je prisustvovao i direktor UPFBiH Mladen Pandurević, član UO Agencije za unapređenje stranih investicija u BiH.

U raspravi o promotivnim aktivnostima FIPA-e za period januar-septembar 2021. godine istaknuto je da je zbog specifične situacije većina promotivnih aktivnosti održana i realizovana online. Između ostalog, održan je sastanak sa Ambasadom BiH u Beogradu, predstavništvom Republike Srpske u Beogradu, Razvojnom agencijom Srbije (RAS) sa ciljem uspostavljanja saradnje i planiranje budućih zajedničkih aktivnosti na privlačenju investicija, poslovni sastanak– Indonezija - Bosna i Hercegovina, potpisani Memorandum o saradnji s Uredom za investicije pri Predsjedništvu Republike Turske s ciljem pružanja podrške razvoju investicione saradnje između dvije zemlje, stvaranja povoljnih uslova za poboljšanje ekomske saradnje, te uspostavljanja direktnih kontakata između poslovnih krugova u BiH i Turskoj, webinar i prezentacija za španske kompanije "Obnovljivi izvori energije u Bosni i Hercegovini", itd.

Na sastanku je prezentovan i Program rada u sklopu kojeg je i Program Promocija i podrška direktnih stranih investicija u BiH kroz direktne kontakte sa stranim investitorima i identifikacija prepreka za strane investicije i prijedlog mjera za poboljšanje poslovnog okruženja. Upravni odbor nije prihvatio Prijedlog rada.

Produžen rok za prijavu na učešće na Svjetskoj izložbi EXPO u Dubaiju



Ministarstvo privrede Kantona Sarajevo objavilo je 22.11.2021. godine Poziv za iskazivanje interesa i prijavu privrednih subjekata za paket podrške za učešće na Svjetskoj izložbi EXPO 2020 Dubai.

Poziv je dostupan na linku: <https://mp.ks.gov.ba/aktuelno/konkursi/poziv-za-iskazivanje-interesa-i-prijavu-privrednih-subjekata-za-paket-podrske-za>.

„Pozivamo sve privredne subjekte koji ispunjavaju kriterije prijave za učešće da se prijave i predstave svoje poslovanje u okviru EXPO 2020 Dubai biznis programa”, pozvao je ministar Delić.

Delić je kazao da će odabrani poslovni subjekti dobiti paket podrške za učešće koji je detaljno objašnjen u tekstu Poziva. Između ostalog, paket podrške podrazumijeva avio kartu, vizu i putničko osiguranje za jednu osobu, pet noćenja u hotelu, prevodioca, vodiča i mnoge druge administrativno – tehničke usluge.

Prijava na ovaj poziv moguća je isključivo putem online aplikacije <https://expo2020bih.ba/biznis-program/> u prvoj fazi, dok će izbor privrednih subjekata, odnosno pregled online prijava, obradu i kontrolu podataka, te ocjenu o ispunjavanju uslova raditi Komisija imenovana

rješenjem Ministarstva privrede KS.

„Resorno ministarstvo će u prvoj fazi izbora objaviti listu privrednih subjekata koji su online aplicirali putem web aplikacije s ukupno ostvarenim bodovima, dok će u drugoj fazi pozvati privredne subjekte s liste privrednih subjekata da dostave potrebnu dokumentaciju koja se traži ovim pozivom, u roku u kojem odredi Ministarstvo u svom obavještenju upućenom za dostavu propisane dokumantacije", pojasnio je ministar Delić.

Kako je dodao, svi privredni subjekti koji ne budu izabrani kroz ovaj poziv mogu o svom trošku učestvovati na Svjetskoj izložbi EXPO 2020 Dubai.

„Ministarstvo privrede Kantona Sarajevo putem organizatora Svjetske izložbe EXPO 2020 Dubai snosit će troškove zakupa prostora paviljona Bosne i Hercegovine i za privredne subjekte koji ne prođu Poziv, te će ga shodno tome moći koristiti za sastanke prema raspoloživim terminima", precizirao je ministar Delić.



Naveo je i da će privredni subjekti koji o svom trošku budu na ovom sajmu od organizatora EXPO Dubai 2020 LLC-SO na paviljonu BiH imati podršku koja podrazumijeva salu za održavanje B2B sastanaka prema raspoloživim terminima, opremu u sali, led ekran za prezentaciju, računar, internet, printer, IT podršku, te administrativnu podršku za procedure i prijave u B2B aplikaciji.

Zbog iskazane potrebe krajnji rok za online prijave produžen do 1. decembra 2021. godine do 23:59 sati.

Poziv je objavljen i na web stranici <http://www.expo2020bih.ba>.

Za sve informacije vezane za ovaj poziv zainteresovani se mogu javiti na e-mail expo@mp.ks.gov.ba ili pozvati na kontakt telefon 033/562-117.

Na inicijativu UPKS pokrenuta masovna akcija pošumljavanja na području KS

Cilj je u prvoj fazi zasaditi 350.000 sadnica

Na inicijativu Udruženja poslodavaca Kantona Sarajevo koju je prihvatio Ministarstvo privrede KS, Vlada KS je usvojila Odluku za realizaciju akcije masovnog pošumljavanja na širem području Kantona Sarajevo.

Ministarstvo privrede Kantona Sarajevo pokrenulo je masovnu akciju pošumljavanja na širem području Kantona Sarajevo koja je planirana u dvije faze. Prva, jesenja faza, trajat će od 01. do 25. novembra 2021. godine i cilj je u tom periodu zasaditi do 350.000 sadnica na površini od 100 hektara vanurbanog prostora.

Planirano je da ovu fazu akcije iznese oko 8.000 učesnika, od kojih su 3.850 učenici trećih razreda srednjih škola i studenti završnih godina studija s područja Kantona Sarajevo, dok će u proljetnu fazu biti uključeni i učenici osnovnih škola.

Predsjednik Skupštine Udruženja poslodavaca KS Nijaz Skenderagić nije krio zadovoljstvo brzom reakcijom ministra Delića na inicijativu koju je ovo udruženje uputilo Ministarstvu privrede i preduzeću „Sarajevo-sume”.



„Moram reći da smo i prethodnih godina izlazili s ovom inicijativom, ali prvi put ona je prihvaćena i u rekordnom vremenu, manjem od mjesec dana, počela je realizacija inicijative masovnog pošumljavanja Kantona Sarajevo. Sretan sam i zahvalan resornom ministru, jer je naša ideja da se svi mi, građani, različitih političkih, društvenih, nevladinih i poslovnih organizacija okupimo u jednom

projektu za dobrobit naše djece i zajednice", istakao je Skenderagić.

Dodao je i da su za udarne dane akcije izabrani, prema preporuci Udruženja, dani 25. novembar, 01. mart i 09. maj koji su svaki ponaosob značajni za našu domovinu, kao dani koji simboliziraju pobjedu slobode nad svime što je tu slobodu ugrožavalo kroz historiju Bosne i Hercegovine.

Kako je na press-konferenciji, održanoj 01. novembra 2021. godine, istakao direktor KJP „Sarajevo-sume“ Samir Omerović, ova akcija je prilika za sve građane i građanke Kantona da učestvuju u projektu koji je od značaja za cijelu planetu, obzirom da su šume, uz vode, jedan od glavnih prirodnih resursa.

„Mi imamo sreću u Kantonu Sarajevo da imamo bogate prirodne šume koje su garancija njihovog opstanka u budućnosti, a ovo pošumljavanje je svojevrsna vještačka podrška i ono je izuzetno bitno za jačanje šumskih kapaciteta, a značajno je i za sve nas, kao zajednicu za godine koje dolaze“, istakao je, između ostalog, direktor Omerović.

Ministar privrede KS Adnan Delić podsjetio je novinare na razloge zbog kojih je ovo resorno ministarstvo iniciralo ovu akciju pošumljavanja, po obimu najveću u posljednjih 30 godina.

„Mi u Sarajevu imamo izražen problem zagađenosti zaraka, posebno tokom jeseni i zime, a drvo koje ima mogućnosti apsorpcije čestica ugljika, u dogledno vrijeme svakako će poboljšati kvalitet zraka u našem kantonu“, istakao je ministar Delić.

Istaknuto je i da je ovu akciju podržala Vlada KS koja je svojim odlukama odobrila njen pokretanje i realizaciju, kao i imenovanje Organizacionog odbora kojeg čine predstavnici resornih ministarstava, javnih preduzeća, te Udruženja poslodavaca KS i Udruženja inženjera i tehničara šumarstva FBiH

Kontakt za prijavu učešća u akciji pošumljavanja je e-mail adresa: posumljavanje@sarajevo-sume.ba i telefon: 033/219-172.

Skupština Kantona Sarajevo usvojila Nacrt zakona o komunalnim taksama

Skupština Kantona Sarajevo je na sjednici održanoj 10.11.2021. godine usvojila Nacrt zakona o komunalnim taksama.

Predloženim zakonom o komunalnim taksama utvrđuju se vrste komunalnih taksi, obveznik plaćanja takse, način uplate takse, nadležnost općina da svojim aktom utvrdi kriterije i visinu takse za obveznike koji su registrovani ili posluju na području općine, oslobađanja od plaćanja takse, način prijave i naplate takse, nadzor i kaznene odredbe, međutim, nisu prihvaćeni amandmani UPKS koji bi umnogome poboljšali ovaj zakon.



Član UO UPKS Muhamed Pilav, kao član Radne grupe za izradu Nacrta Zakona o komunalnim taksama iznio je sljedeće zahtjeve ispred UPKS:

1. Ukipanje najvećeg dijela komunalnih taksi
2. Smanjenje komunalnih taksi za 50% za one za koje se utvrdi da se ne mogu ukinuti
3. Član 4. stav (1) neprecizno formuliše isticanje naziva firme, u smislu da se zahtijeva njeno isticanje na vidnom mjestu u svim prostorijama gdje se obavlja djelatnost umjesto da se to precizno formuliše da se ona ističe u poslovnoj jedinci i sl.

Nacrtom Zakona utvrđivanje kriterija i visina taksi prebačena je na opštinska vijeća na osnovu odluke Ustavnog suda FBiH. Opštine iz KS nisu pokazale ni najmanje spremnosti da se razgovara o ukidanju i smanjenju komunalnih taksi.

Neprihvaćanjem amandmana Udruženja poslodavaca Kantona Sarajevo propuštena je prilika da se pomenutim zakonom poboljša poslovni ambijent ukidanjem ili smanjenjem nepotrebnih nameta.

Održana sjednica Ekonomsko-socijalnog vijeća ZDK

Socijalni partneri pozdravili su donošenje rebalansa te iskazali zadovoljstvo načinom raspodjele planiranih novčanih sredstava



Na sjednici Ekonomsko-socijalnog vijeća za teritoriju Zeničko-dobojskog kantona, održanoj 22. novembra 2021. godine, raspravljalo se o prijedlogu rebalansa Budžeta ZDK za tekuću godinu.

Socijalni partneri pozdravili su donošenje rebalansa te iskazali zadovoljstvo načinom raspodjele planiranih novčanih sredstava, pogotovo što je najveći dio opredijeljen u korist poticaja za privredu, odnosno što su značajna finansijska sredstva planirana za Ministarstvo za poljoprivrodu, šumarstvo i vodoprivrodu, kao i određeni dio za Ministarstvo privrede.

Dio sredstava su opredijeljena i za Ministarstvo za obrazovanje, nauku, kulturu i sport u svrhu rekonstrukcije školskih objekata i Kantonalnoj direkciji za ceste ZDK u svrhu rekonstrukcije cesta.

Potpredsjednik Grupacije poslodavaca ZDK pri UPFBiH izrazio je zadovoljstvo ovakvim rebalansom Budžeta jer se udovoljilo velikom dijelu zahtjeva i sugestija poslodavaca, sa posebnim naglaskom sto se za infrastrukturu i u šest poslovnih zona na području ZDK izdvaja dodatnih 1.700.000 KM.

Poslovna konferencija "Izazovi i budućnost poslovanja"



Poslovna konferencija "Izazovi i budućnost poslovanja" organizovana je u okviru realizacije projekta "Doprinos organizacija civilnog društva poboljšanju uticaja poduzetništva na socio-ekonomski razvoj BiH - EISE" koji finansira Evropska unija, a koji provodi Unija udruženja poslodavaca RS-a.

Konferenciji je prisustvovao predstavnik UPFBiH Husein Al-Baldawi.

Konferencije je održana sa ciljem da se kroz dijalog poslodavaca, predstavnika vlasti, akademske zajednice, institucija i stručnih organizacija prepoznaju ključne ekonomske i socijalne izazove, kao i pravce djelovanja ka stvaranju produktivne i socijalno pravedne zajednice.

Kao ključne izazove poslovna zajednica u ovom trenutku prepoznala je dalje smanjenje ponude radne snage, rast inflacije, potencijalnu krizu nabavke materijala i repromaterijala, te ukazala na problem stagnacije produktivnosti u uvjetima kontinuiranog rasta plata.

Nova članica UPFBiH - Saraj-komerc d.o.o.

Saraj-komerc d.o.o. je osnovana 2000. godine i danas predstavlja prepoznatljiv brend u metalnoj i automobilskoj industriji. Osnovna djelatnost poduzeća je obrada metala.

Svoje poslovanje su uskladili s najvećim svjetskim standardima podrazumijevajući pri tome sistem upravljanja kvalitetom (ISO 9001 i IATF 16949) i zaštitom okoliša (ISO 14001), a takvo poslovanje je potvrđeno od renomirane certifikacijske kuće TÜV SÜD Management Service GmbH.



Saraj-komerc izvozi u Njemačku, Austriju, Češku, Bugarsku, Rumuniju, Tursku, Tunis i Indiju.

Više o kompaniji pročitajte na [stranici](#).

Nova članica UPFBiH - AMA Adriatic d.o.o.



AMA je vodeća kompanija za proizvodnju komponenti i opreme za opremanje i održavanje terenskih vozila, poljoprivrednih i baštenskih mašina.

AMA ADRIATIC d.o.o. je dio AMA grupe sa sjedištem u Ilijasu. Objedinjuje proizvodnju standardnih i prilagođenih hidrauličnih cilindara, kabelskih snopova i jeftinijih vozačkih sjedišta za OHV.

Proizvodni proces je zaokružen zahvaljujući odjelima mehaničke obrade, zavarivanja, montaže i ispitivanja, koji zadovoljavaju najviše standarde kvalitete.

Više o kompaniji pročitajte [OVDJE](#).



UDRUŽENJE POSLODAVACA

**UDRUŽENJE POSLODAVACA FBiH
MARŠALA TITA 6, 71 000 SARAJEVO**

TEL: 00 387 264 830

FAX: 00 387 33 552 461

MAIL: info@upfbih.ba

WEB: www.upfbih.ba